




M 1197

oo
Min

P. 4. 63

Th. Q. V, ~~407~~ 699.



1

Des alten Christlichen
Lieds / Ein Kindelein so lobelich / etc.
kurze erklerung

Iohannis Gigantis.



ESAIÆ IX.

Ein Kind ist vns geboren/
Ein Son ist vns gegeben / etc.

ANNO 1564.

[Faint, mirrored text, likely bleed-through from the reverse side of the page]



ESALIE IX

[Faint, mirrored text, likely bleed-through from the reverse side of the page]

ANNO 1568

457



Allen meinen lieben

Pfarfindern zur Freystad / wünsche

ich Johannes Gigas / Gottes Gnad vnd
Segen in Jesu Christo.

Geliebten im Herrn / Sehr wol gefelt
mir des lieben Vaters Augustini Gebet: O
Gott verley / das ich mich vnd dich erkenne/
Denn vnser heil vnd seeligkeit stehet darinn
nen / das wir vns erkennen als arme menschen / die durch
Adams sünde vnd fall / an leib vnd seel verderbet / in not
vnd tod komen sind / vnd das wir Gott erkennen als ei-
nen gütigen barmhertzigem Vater / welcher vns wider-
umb zu gnaden annemen / vnser sünde vergeben / vnd
das ewige leben geben wil / so wir vns halten an Jesum
Christum seinen einigen Son / vnsern Herrn / geboren
aus Maria der Jungfrauen / etc. Dieweil denn bei-
des / nemlich / vnser elend vnd trost / fein kurtz vnd rund
in dem alten Christlichen Lied / so aus dem Neunden
Capitel Esaia genomen / begriffen ist / hab ich euch das-
selbe furm jar einfeltig erkleret / vnd wils euch hertzlich
commendirt vnd befohlen haben. Denn alle die sich
den Heiligen Geist vmb ire sünde vnd elend straffen /
vnd durchs Euangelium / auff dis Jesulein sich weisen
lassen / dasselbe in eigenem waren Glauben ergreifen
vnd behalten / werden das reich Gottes ererben. Derwe-
gen jr auch aus grund ewers hertzens Gott danckē solt /
das jr den edlen Samen / Gottes wort / rein habt / neben

A ij dem

dem rechten gebrauch der heiligen Sacramenten / Denn
wo das ist / da ist gut sein / da kan man recht beten vnd
getröstet werden / da werden Christen gezeuget / Psal.
84. Es heist ja / Quos elegit hos & vocauit, Rom. 8. Ihr
wisset / wie der Königliche Prophet David inn seinen
Psalmen dieser wolthat Gottes so offft vnd hertzlich ge-
dencket. Ihr solt aber darumb nicht sicher sein / ob ir
wol Gottes wort rein vnd reichlich habet / sondern ein
jeder sehe auff seine schantze / bete / meditare vnd studi-
re / Denn itzund viel Christen sind nomine, aber wenig-
re, So werden auch in den letzten zeiten viel Eceboliren
vnd Wetterwendisch werden / Wie ich euch offft erinne-
re der Historien so sich zur zeit des Keyfers Constantij
zugetragen hat / lib. 1. Hist. Trip. cap. 7.

Unser lieber Gott vnd Vater regiere vnd füre euch
mit seinem heiligen Geiste vmb Christi willen / das ir
bey der erkandten angenommenen warheit / bestendig-
lich müget fusshalten / darinnen wachsen vnd zuneh-
men / das ir auch Christlich vnd freundlich bey einan-
der wonen / vnd in gedult vnd mit gutem gewissen
auff den tag des Herrn warten müget /

Amen. Geschrieben zur Freystad
Mense Nouembri, Anno

1563.

ESAIÆ IX.

In Kindelein so löbelich / ist vns geboren
heute / Von einer Jungfraw seuberlich / zu
trost vns armen Leuten / Wer vns das
Kindelein nicht geborn / so wern wir allzumal
verlorn / das heil ist vnser aller / Ey du süßer Je-
su Christ / das du Mensch geboren bist / behüt
vns für der Helle / etc.

Ieben freunde in Christo / dieweil die heiligen
Engel sich so sehr freuen vber der Heiligen
Menschwerdung des ewigen Sons Gottes / vnd
singen den Newgebornen König an / machen jm so ein
schönes herrliches Genethliacon : Ehre sey Gott inn der
höhe / vnd friede auff Erden / vnd den Menschen ein
wolgefallen / etc. Wie jr darnach aus dem Euangelis-
ten Luca hören werdet / Viel mehr sollen wir arme Luæ
Kinder frölich sein / vmb welcher willen der Son Got-
tes auff Erden komen / vnd aus Davids Haus vnd Ge-
blüt leibhafftig worden ist / Wie die Schülerlein aus
dem Symbolo Niceno singen / Qui propter nos homines &
propter nostram salutem descendit de coelis, &c. Vnd sollen
Gott vor seine grosse vnaussprechliche wolthat vnd gü-
te / hertzlich dancken / das er vns nicht ewig / wie die bö-
sen Geister / nach vnserm fall verstossen / sondern mit
seinem einigen lieben Sone verehret hat / der in vnser
arnes fleisch vnd Blut sich verkleidet / wie die Kirche
A iij diese

Diese zeit vber singet / vnd wie hiruon sehr eigent-
lich vnd tröstlich redet S. Johannes : Verbum caro factum est, &c.

Wie hette doch der Himlische Vater / seine liebe gegen dem Menschlichen geschlecht reichlicher beweisen können? Wie der Herr Christus selbs hiruon so ein hertzlich seufftzen thut / Johan. 3. da er das gesprech mit dem guthertzigen Nicodemo beschleust / vnd spricht: Also hat Gott die Welt geliebet / das er seinen einigen Son gab / Auff das alle die an in glauben / nicht verloren werden / sondern das ewige Leben haben / etc.

Wie hette auch der ewige Son Gottes / sich neher zu vns thun können / denn das er vnser Fleisch vnd Bruder wird?

Wie köndte auch der Heilige Geist vns grössere gute erzeigen / denn das er sich in vnser hertzen senden vnd giessen lest / das wir teilhafftig werden Göttlicher natur / Christum erkennen / an in glauben / vnser seligkeit gewis sein / vnd recht beten mügen? Zachar. 12.

Solche wolthat sollen wir ja billich perpendiren / vnd mit hertzen vnd mund rümen / vns derselben trösten.

Derwegen dieweil wir in Gottes namen / abermal auff dis freudenreiche Fest hir zusammen komen sind / wollen wir das schöne alte Lied / Ein Kindelein so löbelich / etc. betrachten / darin die lieben Alten / vnser elend vnd trost / fein zusammen gefast haben / etc. Denn dis die Summa vnd inhalt des alten Gesangs ist.

Der

Der einige Son Gottes / der aus dem hertzen
Gott des Vaters von ewigkeit entsprossen vnd gebo-
ren ist / Mich. 5. Johan. 1. vnd 17. hat Menschlich nas-
tur / ja vnser armes Fleisch vnd Blut (doch one sünde)
an sich genomen / Vnd sind die zwo naturen / die Gött-
liche vnd Menschliche / in einer unzertrenlichen person
vereiniget / vber welchem Wunderwerck vnd geheim-
nis / die lieben Engel sich nicht gnugsam verwundern
können. Solchs aber ist darumb geschehen / das vns
armen Eva Kindern / aus not vnd tod geholffen wür-
de / das wir in diesem geliebten natürlichen Son Got-
tes / auch möchten die Kindschafft empfaben / Gala. 4.
Denn alle die jr sünd vnd elend durch Gottes Gesetz
erkennen vnd beseufftzen / vnd in eigenem waren Glau-
ben / dis Jesulein in jr hertz drucken / sich seiner Mensch-
werdung / seines Leidens vnd Sieges trösten / werden
erlediget vom stecken irers treibers / von der mühe irer
schulter / vom ioch irer last / vnd bekommen recht fried
vnd freude / Esa. 9. Romano. 5. Dirin steckt eitel
trost / das vnser Helffer vnd Mittler / der rechte Held
geminæ substantiæ ist warer Gott vnd Mensch. Denn
dieweil er warer Gott ist / kan er vns wol helffen / Die-
weil er warer Mensch / ja vnser Bruder ist / wil er vns
helffen / wenn wir vns zu jm halten / etc.

Wir wollen aber dis Liedlein auffss kurtzte von
wort zu wort postilliren / auff das jr den sachen fein
nachdencket / wenn ihrs hie inn Christlicher versam-
lung / oder daheim mit ewren Kindern singet / vnd nicht
von euch gebt sine mente sonum.

Lin

Ein Kindelein.

Esaias frölich im Geist spricht also 700. jar fur der heiligen Menschwerdung Jesu Christi: Ein Kind ist vns geboren / Ein Son ist vns gegeben / welches herrschafft ist auff seiner schulter/etc. Die hören wir / das nur ein Helffer / vnd fac totum, ein einiger Mittler / Weg vnd steg zum Himel ist / Johan. 14. Actor. 4. 1. Timo. 2. Derwegen suche man nirgend hülffe / denn bey diesem Kindelein / welches ein Mennlein ist / Apocal. 12. Zu dieser leiter vnd brücken halt du dich / so kömest du in Himel / vnd vber den Jordan / in das verheissene gute Land / darinnen Milch / Honig / labfal ist / Esai 55.

Kindelein.

Das aber vnser Helffer zu vns kömpt als ein holdseliges liebliches Kindelein / vnd in grossen armut / geschicht als vns zu trost / etc.

Warumb kömpt er arm zu vns ?

Diervon gibt S. Paulus guten bericht / 2. Cor. 8. Ihr wisset die gnade vnsern Herrn Jesu Christi / das / ob er wol reich ist / ward er doch arm vmb ewert willen / auff das jr durch sein armut reich würdet / Wie wir heute singen: Er ist auff Erden komen arm / das er vnser sich erbarm / vnd in dem Himel machet reich / vnd seinen lieben Engeln gleich / etc. Das ist vns ja ein guter wechsel / etc. Er wird geborn zu Bethlehem in Stalle /

stalle/am frembden orte / die Krippe ist seine Wiege/
Dew vnd stroh sind seine Bette / Er gehet zu fusse/
Er wird ins elend verschicket / ja sein gantztes leben
auff erden ist lauter elend vnd armut gewesen. Wie er
selbs spricht / Matth. 8. Die Füchse haben gruben/
vnd die Vogel vnter dem Dimel haben nester / aber
des Menschen Son hat nicht da er sein heupt hina
legt/ etc.

Hieran spiegel dich du lieber Christ/murre vnd
gruntze nicht wider den lieben Gott / wenn du arm
bist/vnd vnterm creutz stehest / Sibe/ was fur creutz
vnd armut/der König aller Könige deinet halben auff
erden / willig vnd gedüldig erlidden hat. Des vns
auch Cyprianus erinnert / in der Predigt vom heuti
gen fest/da er spricht: Ciuitas parua, domus paupercula,
supellex exigua, mater in foeno, filius in præsepio, &c. Wel
chs ich also gefast habe:

En iacet in paleis sub inani & paupere tecto

Saluator, Mariæ filius atq; Dei.

Non sunt Assyrijs exculta palatia nimbis,

Sed parua est magni pompa puerperij.

Cur homo multijuga peccati mole grauatus,

Abnuat hîc Regis symbola ferre sui?

Warumb kömpt er zu vns ein freundli ches Kindelein?

Das wir vns nicht dürffen noch sollen sche
wen/ fürchten oder entsetzen/ bey im rath vñ hülffe zu
suchen/ Er wil nicht Moises oder Austerus Cato, son
dern vnser freundlicher Emmanuel sein/hat holdselige
lippen/

lippen / hat mit den seinen ein mitleiden vnd vortemen / Psalm. 45. Esa. 42. Heb. 5. hilfft gerne / etc. Wie solchs in Euangelisten / die seine Historien beschreiben / zusehen ist / Wen hat er doch jemals fürn Kopff gestossen? Welche hat er vnfreundlich abgewiesen / die bey im hülffe gesucht? Wie erzeugte er sich gegen dem armen Blinden Luca 18. Item gegen Marien Magdalenen Luca 7? Ja gegen dem bußfertigen Schecher am Creutz? Also ist er noch gegen allen gesinnet / die Buß thun / Er strecket noch seine arme aus / vnd rufft freundlich: Kompt her zu mir alle die jr müheselig vnd beladen seid / ich wil euch erquickten / etc. Alleine procrastinire nicht / vnd sündige nicht auff gnad.

Löblich.

Er ist allein der liebe Son vnd lobens werd / Matth. 17. Er ist der schönste vnter den Menschen Kindern / Psalm. 45. Ist one sünde vnd betrug / 1. Petri 2. Durch die vberschattung vnd wirkung des Heiligen Geistes empfangen / von einer Jungfrauen geboren / ist vnser Heiland / König / Hoherpriester / vnd getrewer Hirte / Er vergibt vns alle vnser sünde / Er heilet vnser gebrechen / Er erlöset vnser leben von verderben / Er Krönet vns mit gnade vnd barmhertzigkeit / Ein solcher Herr ist ja lobens werd / von solchem Herrn soll man ja billich singen vnd sagen / etc.

Wenn du dein leben verwircket hettest / vnd würdest hart gefenglich gehalten / vnd einer sich deiner

ner anneme/dich frey vnd ledig machte/den würdestu
ja lieben vnd loben / Warumb woltestu nicht loben
vnd preisen Gottes vnd Marien Son / der dich aus
Aegypten füret / vnd aus der dümmitz vnd gruben erle-
diget / da kein labfal innen ist? Zach. 9. Ja / der Hi-
mel vnd erden zusammen helt / dich mit seinem Himli-
schen Vater versönet / welchs inen sein heiliges / tew-
res / rosenfarbes Blut kostet? etc.

Ist Vns geboren.

Dis edle wörtlein (Vns) sollen wir ja nicht
vberhüpfen / denn es sehr tröstlich / vnd ein wort des
Glaubens ist / das wir alle wolthat des Herrn Chri-
sti vns zueignen vnd appliciren / das er vns zu gut
Mensch worden ist / gelidten hat / gestorben vnd auff-
erstanden ist / etc. Denn seinet halben wer er wol vns
gecreutziget blieben. Vnd hie sehet jr / warumb wir
mit David vnd Paulo dem Glauben so viel geben /
dieweil er das güldin Kinglein ist / darin gemma gem-
marum, der Herr Jesus Christus vorsatzet vnd gefast
wird / vnd allein der ware Glaube / vnser gewissen still-
let vnd frölich macht / Roma. 5.

Geboren.

Das ist / Gottes einiger / ewiger / wesentlicher
Son / ist vnser Fleisch vnd Blut worden / hat Mensch-
liche natur (doch one sünde) an sich genomen / Die-
sen rhum haben die Engel nicht / Heb. 2. Des sollen
B ij wir

wir vns ja trösten/Wie der liebe Bernhardus/die heilige Menschwerdung des Sones Gottes / jme wol nützlich machen kan / Warumb solte ich trawrig sein/ spricht er / sitzt doch mein fleisch vnd blut/ ja mein Bruder/zur rechten Gottes / mein König / Pastor vnd Patron/schützet/vortrit vnd vorbitt mich. Wie auch hienon im Geist exclamirt S. Paulus Rom. 8.

Du kanst dem Satan nichts leiders thun/ denn das du hertzlich singest: Verbum caro factum est. Item/ Gelobet seystu Jesu Christ / das du Mensch geboren bist/rc.

Heute.

Dis Hodie heisset die gnadenreiche zeit von der heiligen Menschwerdung des Herrn an bis an Jungsten tag / Von diesem Hodie sagt auch der Engel im heutigen Euangelio zum Hirten/ Fürchtet euch nicht/ Euch ist Heute der Heiland geboren / welcher ist Christus der Herr/in der Stad David/rc. Bisweilen heisset Hodie inn heiliger Schrift von ewigkeit her / Denn gleich wie dieses Herrn Geburt zweierley ist/eine ewige/die ander in der fülle der zeit / also hat er auch zwey Hodie. Sonst wisset jr wol/das bey Gott weder Heri noch Hodie/weder anfang noch ende ist.

Von einer Jungfraw seuberlich.

Das Messias einer Jungfrawen Söhnlein hat sein sollen/ ist bald in der ersten verheissung / Adam
vnd

vnd Lue geschehen/angezeigt worden/Des Weibes
Samen soll der Schlangen den kopffzutretten/ Ge-
ne. 3. Vnd ist hernach durch Esaiam klar ausge-
druckt worden/7. cap. 2c. Denn die weil wir Adams
Kinder alle inn sünden entpfangen vnd geboren wer-
den/Psal. 51. Musste vnser Seeligmacher one sünde
entpfangen vnd geborn werde/da gehorte eine Jung-
fraw zu / vnd der heilige Geist / der im keuschen leibe
der werden Jungfrawen Marien / zu solcher geburt/
das geblüt gereiniget vnd geheiliget hat/2c. Eine sol-
che Mutter / die one Mannes gemeinschafft / durch
vberschattung vnd wirkung des heiligen Geistes
schwanger worden ist / vnd den Heiland zur Welt
bracht hat/wird billich eine schöne/seuberliche Mut-
ter genant / Denn ob sie wol one zweifel auch eusser-
lich schöne gewesen ist / wie Nicephorus schreibet/
wird sie doch furnemlich darumb schön vnd seuber-
lich genant/das sie Christi Mutter/vnd Gottfürchtig
vnd züchtig gewesen ist.

Zu trost vns armen leuten.

Wer dieses Kindeins geniessen wil / der mus
kein frecher/wilder mensch/auch kein heuchler / son-
dern im geist arm sein / Wenn du durch das heilige
creutz vnd Gottes Gesetz / welchs geistlich vnd der
sünden krafft ist/gedemütiget vnd müheselig worden
bist/zum creutz kreichest/vnd für diesem Jesulein ein
fußsal thust/so wirstu angenommen/denn dieser Dim-
lischer vnd seelen Artzt/wil haben esurientes, gementes,

B ij

flens

flentes, Esa. 61. Matth. 11. Wie auch seine werbe Mutter
in irem schönen geistreichen Magnificat singet/ ꝛc.

**Were vns das Kindlein nicht geborn/
so weren wir allzumal verlorn.**

Da hōrestu das wir recht singen / Es ist das
heil vns komen her/aus lauter gnad vnd gūte/ꝛc. Das
Himmelreich ist ein geschenck vmb Jesu Christi wil-
len/Wie solchs S. Paulus reichlich beweiset zun Rō-
mern vnd Galatern / Wenn sich Gott vber vns nicht
erbarmet / vnd sein Son sich vnser nicht angenommen
vnd für vns zalet hette/ so were es mit vns gar aus ge-
wesen. Derhalben alle die andere wege vnd stege
gehn Himmel suchen / denn allein durch Christi gang
zum Vater/verachten Gottes genade/Christi teures
Blut/ gehen mit vnmöglichen dingen vmb / bleiben
für vnd für vnterm fluch/ vnd müssen in iren Sünden
sterben vnd verderben/ ꝛc.

Das heil ist vnser aller.

Der Son GÖttes ist vmb vnser aller willen
Mensch worden/hat für alle menschen gelidden/ vnd
genug gethan / Darumb heisset er Agnus Dei, auff
welchs Gott vnser aller sünde gelegt hat / Esaia 53.
Wie nu die Sonne allen leuchtet / also ist dieser Hei-
land vns allen fürgestellet/ wie der liebe Senior singet/
Luca 2. Derwegen sich niemand ausschliessen oder
absonn

absondern soll / Sondern dieweil wir durch Adams
fall / alle sündler vnd Kinder des zorns worden sind /
Roman. 5. Ephes. 2. sollen wir vnser sünd vnd elend
beseufftzen / vnd bey diesem getrewen Herrn vñ Hei-
land anknopffen vnd hülff suchen. Du solt nicht verz-
zagen noch verzweiffeln / wie der elende mensch inn
Hungern / der sich in die Schul gehenckt / vnd ein zet-
tel an hals gebunden hat / darin geschrieben gewesen:
Commendo vos Deo, cuius misericordia mihi denegata
est.

Wo lifestu das in heiliger Schrift?

Wie kömpts aber / dieweil Christus vnser aller
sünde getragen / vnd dafür zalet hat / das nicht alle
menschen selig werden? Davon lesen wir Johan.
1. vnd 3. cap. Die welt liebt finsternis mehr denn das
licht / sie wil nicht mit den lieben Engeln singen / Glo-
ria in excelsis Deo. Die menschen leben entweder mut-
willig in sünden / oder gedenccken durch gleisnerey inn
Himmel zu kómen / verstehen Gottes Gesetz nicht / er-
kennen Christum nicht recht / doher lauter heucheley
vnd vermessenheit volget / wie am Phariseer zusehen /
Luca 18. Darumb wird der Herr Christus bisweis-
len genand der Heiland der gantzen welt / dieweil er
für vns alle gestorben ist vnd zalet hat / 2. Cor. 5. 1. Jo-
han. 2. Bisweilen wird er genand der Bleubigen
Heiland / dieweil allein die Bleubigen vnd waren
Christen / sein genieffen vnd selig werden. Derwegen
die Alten zu sagen pflegen: Christus pro omnibus hominibus
bus

bus hominibus passus est sufficienter, sed non efficienter.
Aber / Mors Christi precio valet pro omnibus, efficacia pro
credentibus.

Ey du süßer Jesu Christ / das du
Mensch geboren bist / behüt vns für der
Helle.

Die wird angezeigt / was der Son Gottes / der
vnser halben Mensch / ja ein würmlein vnd fluch
worden ist / Psalm. 22. Gal. 3. Der vnser halben eine
zeitlang sich seiner Maieſtet vnd herrligkeit geeuffert /
vnd durch seine Wunden vnd striemen vns erkauft
vnd erlöset hat / Esa. 53. Phil. 2. etc. von vns fodert
vnd haben wil / Nemlich / nicht silber / gold / Wallen-
fart / etc. sondern nur Sacrificium laudis, das wir danck-
bar sein / inen für vnsern warhafftigen Helffer vnd
Erlöser / König vnd Hohenpriester erkennen / anruf-
fen / küssen / hertzen / vnd das wir dem Euangelio wir-
diglich leben / wie denn ware Christen thun. Denn
welche der Herr gerecht macht / die heiliget er auch /
vnd alle rechtschaffene Weinreben am grossen vnd
heiligen Weinstock / bringen gute fruchte / dadurch
Gott geehret / vnd dem Nächststen gedienet wird / Jo-
han. 15. etc. Ir wisset das ware Christen haben iusti-
tiam imputatam & inchoatam, (denn dort werden sie erst
gar Engelreine / volkommen vnd satt sein / Psal. 17) Sie
trawen vnd bawen aber alleine auff die zugerechnete
Gerechtigkeit / die Gerechtigkeit des Glaubens an
Jesum

Jesum Christum / dadurch sie auch alleine für Gott
bestehen / gerecht vnd selig werden. Von welcher selig-
machenden Gerechtigkeit geschrieben stehet / Gen. 15.
Abraham glaubte dem Herrn / vnd das ward ime ge-
rechnet zur gerechtigkeit. Also hat der Son Gottes
seine gebührende ehr / vnd betrübt Christen haben ge-
wissen trost / Wie hiron sehr wol schreibet S. Pau-
lus Rom. 4. Derhalben mus die Gerechtigkeit durch
den Glauben komen / auff das sie sey aus Gnaden /
vnd die verheissung feste bleibe allem Samen / &c.

Beschluß.

Es ist gung. So habt jr lieben Christen / Kurtze
einfeltige erklerung dieses alten Christlichen
Gesanges / von vnserem jamer vnd elend / vnd
von vnsern lieben Herrn Jesu Christi person vnd
Ampt / vnd wie wir vns gegen dem Jesulein vnd Im-
manuelichen verhalten sollen / &c. Welcher Lobge-
sang auch im Papstumb blieben ist / daran sich one
zweuel viel gehalten haben / vnd im Herrn sanfft
eingeschlaffen / vnd selig worden sind. Dis Liedlein
last vns noch lieb haben / denn es alles vns darumb
zu thun sein soll / das wir arme Adamskinder Jesum
Christum durchs Euangelium erkennen / vnd vns sei-
ner heiligen Menschwerdung / Wunden / Aufferste-
hung vnd Himelfart / &c. wider den fluch des Gese-
tzes /

tzes/Sünde/Tod/Welle/Teuffel/Welt/vnd alles
elends/trösten/etc. Ach lasset vns ja hertzlich Gott
dancken/das wir in friede hie zusamen komen/Gottes
wort leren vnd lernen/dis vnd andere Christliche Lieder
in der gemeine singen dürffen. Für 110. jaren ist
dis Liedlein zu Constantinopel in Griechenland/für
40. jaren zu Ofen inn Hungern/nach gesungen worden/
Was singt man itzt da? Darumb lasset vns ja
mit vnsern Kindern/dis Fest von der gnadenreichen
heiligen Menschwerdung vnd Geburt vnser lieben
Herrn Jesu Christi/frölich vnd mit dancksagung be-
gehen/denn es nicht ein newe fest ist. Es habens für
5525. jaren gehalten vnser erste Eltern/da inen der
Schlangentretter zugesagt worden ist. Darnach ha-
bens auch ire nachkömlinge mit freuden gehalten/
vnd ist allein dieser vnderscheid zwischen inen vñ vns:
Sie haben gesungen/Ein Kindelein so löbelich wird
vns geboren werden/Wir singen/Ein Kindelein so
löbelich ist vns geboren/xc. Dieweil denn die lieben
Altueter/Patriarchen vnd Propheten/des zukünfftigen
Messia sich so hertzlich gefrewet habē/viel mehr
sollen wir mit vnsern Kindern frölich sein/dieweil er
zu vns komen ist/mit vns gessen vnd getruncken/seine
allmechtigkeit mit lehr vnd wunderzeichen reichlich
bewiesen hat/hat sein opffer für vns volbracht/ist als
der rechte Held aufferstandē/als der rechte Sieges-
fürste gen Himel gefaren/vnd nu sitzt zur rechten sei-
nes Himelischen Vaters/vnser König/Patron vnd
Bruder/etc.

Wir

Wir dancken dem gütigen Gott für alle seine
wolthat / sonderlich das er vns aus lauter liebe vnd
gunst / mit seinem lieben Son verehret / vnd vns dis
jar bey seinem Wort gnedigklich erhalten / vnd für
Krieg / Fewr / tewrung / veterlich behüt hat / Er wölle
weiter vnser lieber Vater sein vnd bleiben / vmb seines
lieben Sones / vnser Herrn Jesu Christi willē / vnd
wolle vns itzo am ende der welt / mit seinem Geist re-
gieren vnd stercken / vnd wans zeit sein wird / ein seligs
friedlichs Simeons stündlein bescheren / Amen.

Galat. iiii.

Da die zeit erfüllet ward / sandte Gott seinen
Son / geborn von einem Weibe / vnd vnter das Gesetz
gethan / auff das er die so vnter dem Gesetz waren / er-
lösete / das wir die Kindschafft empfiengen / etc.

NICEPHORVS lib. I.

cap. vlt.

Effigies formæ Domini nostri Iesu Chri-
sti, sicuti à veteribus accepimus, talis fuit, Egre-
gio is viuidoq; vultu fuit, corporis statura ad pal-
mos prorsus septem, Cæsariem habuit subflauam
ac non admodum densam, leniter quodammodo
ad crispas declinantem, supercilia nigra, non per-

C ij inde

inde inflexa. Ex oculis superflauescentibus mirifica prominebat gratia, acres erant, & nasus longior, barbæ capillus flauus, nec admodum demissus, capitis capillos tulit prolixiores, nouacula enim in caput eius non ascendit, neq; manus aliqua hominis, præter quam matris, in tenera duntaxat ætate eius, collum fuit sensim decliue: Ita vt non arduo & extenso nimium corporis statu esset, porrò frumenti referens colorem. Non rotundam aut acutam habuit faciem, sed qualis matris eius erat, paulum deorsum versum vergentem, ac modicè rubicundam, grauitatem atq; prudentiam cum lenitate coniunctam, placabilitatemq; iracundiæ expertem, præ se ferentem, persimilis deniq; fuit immaculatæ suæ genitrici, &c.

Idem lib. 2. cap. 25.

Beata virgo Maria, mater Domini nostri Iesu Christi, erat in rebus omnibus honesta & grauis, pauca admodum eaq; necessaria loquens, ad audiendum facilis, & valdè affabilis, honorem & venerationem omnibus exhibens, statu-
ra me-

ra mediocri, decenti dicendi libertate aduersus
homines omnes vfa est, sine risu, sine perturbati-
one, & præcipuè sine iracundia, colore fuit fru-
mentum referente, capillo flauo, oculis acribus,
subflauas & tanquam oleæ colore pupillas in eis
habens, supercilia ei erant inflexa, & decenter ni-
gra, nasus longior, labra florida, & verborum
suauitate plena, Facies non rotunda nec acuta, sed
aliquanto longior, manus simul & digiti longio-
res. Erat deniq; fastus omnis expers, mini-
meq; vultum fingens, nihil molliciei se-
cum trahens, sed humilitatem
præcellentem co-
lens, &c.

C ij Gebet

Gebetein.

Ich armer mensch gar nichts bin/
Gotts Son allein ist mein gewin.
Das er Mensch worden/ ist mein trost/
Der hat mich durch sein Blut erlost.
O Gott Vater regier du mich/
Mitt deinem Geiste stetiglich.
Las deinen Son mein trost vnd leben/
Allzeit in meinem hertzen schweben.
Vnd wenn die stund vorhanden ist/
Nim mich zu dir Herr Jesu Christ/
Denn du bist mein vnd ich bin dein/
Wie gern ich wolt bald bey dir sein/Amen.

Gedruckt zu Franckfurt an der Oder/
durch Johann. Eichorn.



ULB Halle

3

002 111 42X




Stor

AB 155599







Des alten Christlichen
Lieds / Ein Kindelein so lobelich / etc.
kurze erklerung

Iohannis Gigantis.



ESAIÆ IX.

Ein Kind ist vns geboren/
Ein Son ist vns gegeben / etc.

ANNO 1564.